

直隸霍州志卷二

星野

星野之說古書既亡後人紛紛聚訟議禮且然譚天當更遠矣後渠安陽志對山武功志竟不立此一門未爲無見然遼史以缺漏蒙譏二志亦何由得免大抵地道常靜而天道常動必謂星躔次舍與地之南北東西尺寸悉可求合此亦何能盡信惟晉星爲實沈之次自左氏而下天文家無有異議則固不可廢也舊志志星野寥寥六十餘字未免過於矜慎今節錄古說以備稽考於州分則據今測主參而不兼觜以見言天者之未可以執一也覽者或有取焉

周禮馮相氏掌十有二歲十有二月十有二辰十日二十有八星之位辨其敘事以會天位冬夏致日春秋致月以辨四時之敘

保章氏掌天星以志日月星辰之變動以觀天下之遷辨其吉凶以星土辨九州之地所封域皆有分星以觀妖祥以十有二歲之相觀天下之妖祥 按星

土之名始見周禮鄭注星所主土是也從來作地志者專摘以星土辨九州數語第馮相氏掌日月星辰之常度保章氏掌日月星辰之變動必知其常而後可以達變故兼錄之

左傳昭公元年子產曰后帝遷實沈於大夏主參按服注大夏在汾澮之間杜註今太原晉陽也史記禹鑿龍門通大夏括地志云大夏今并州晉陽及汾絳等州是也

國語董因曰實沈之墟晉人是居所以興也

直隸霍州志

卷一

星野

一一

史記天官書晉之疆侯在辰星主在參伐

漢書地理志魏地觜觶之分野也其界自高陵以東盡河東河內按班志列秦魏周韓趙燕齊魯宋衛楚吳粵分野之詳舉漢時郡縣隸之其言多不足據惟魏都安邑以觜觶參分野則仍參爲晉星之舊耳唐書天文志觜觶參實沈也初畢十度餘八百四十一杪四之一中參七度終東井十度得漢之河東及古晉魏地

圖書編平陽觜參分野又山西諸郡三觜參四參井惟

大同爲昴畢也

宋史河東路當觜參之分

明史天文志畢七度至井八度實沈之次山西之太原府石忻代平定保德崞嵐平陽府皆參分絳蒲吉隰解霍皆觜參分

蔡邕月令章句自胃一度至畢六度謂之大梁之次趙之分野也自畢六度至井十度謂之實沈之次晉之分野也

皇甫謐帝王世紀自畢十二度至東井十五度曰實沈

直隸霍州志

卷一

星野

三

之次於辰在申謂之涿灘於律爲仲呂斗建在巳今晉魏之分野

漢永元銅儀參八度去極九十四度元祐測驗參十度右足入畢十三度

宋兩朝天文志參十星距中星西第一星去極九十二度半觜三星距西南星去極八十二度半

隋天文志觜觶三星主葆旅收斂萬物明則倉儲盈參十星一曰參伐一曰大辰一曰天市一曰鈇鉞主斬刈又爲天獄主權衡所以平理也又主邊城爲九澤

故不欲其動也參白獸之體其中三星橫列三將也
東北曰左肩主左將西北曰右肩主右將東南曰左
足主後將軍西南曰右足主偏將軍中央三小星曰
伐天之都尉也王道明則芒角斂芒角不動邊候輯
寧七將皆明天下兵精

參上爲五星日月中道甘氏曰參爲忠良孝謹之子
明大則臣忠子孝安吉觜二度在參之右角如鼎足
形主天之關明大則天下安五穀熟

按霍爲古冀州之域春秋時屬晉前代傳志皆言參

爲晉星實沈之次此第統論晉之分野未析言霍也
惟歐陽公唐天文志云古晉魏虞唐耿揚霍冀黎郇
皆觜參分明劉誠意伯清類天文分野云太原府石
忻代平定保德崞嵐平陽府皆參分絳蒲吉隰解霍
皆觜參分據此則霍在觜參之間矣夫平陽與太原
同分霍居太原之南平陽之北平陽尚爲參分霍奚
爲兼觜也且星之一度當地之二百五十里霍距平
陽止一百四十里是更無兼觜之理矣前明禮部尚
書徐光啓上見界揔星圖謂觜宿距星唐測在參前

三度元測在參前五分今已侵入參宿故舊法先觜
後參今則先參後觜伏考

欽定七政自乾隆癸未觜僅有初度而參得十二度是觜
之爲度將無可紀此一州二屬斷與太原平陽同分
亦未爲不根之論也至於占驗之術就晉言晉如歲
在實沈重耳返國太白食昴長平事應黃星出昴畢
之分而元魏起於代北太白晝見在參而太武遂幸
隰城四星聚觜觶參分而高齊始霸流星出昴畢東
南而尒朱氏殲於赤洪嶺自古以來占應不爽惟求
之愈密將言之愈鑿是徒滋炫惑矣我
皇上格天凝命自有本原居官守土者益勵於人事無有
闕失自然感召天和山華岳曜祝史占侯之術雖不
問焉可也